

Pauro Tesaronika ezektsa bo ziwatahakazo

Pauro usa papeu Tesaronika ezektsa bo ziwatahakazo. Sesus myziksizo naha soho ziwatahaka. Deus Pauro ziapewywyky iwatahi katsa kino niwatihi tanymyryky.

1 ¹Uta Pauro ikiahatsa bo piwatahaka. Siras Timoteo iwatsa katuk mykaranaha. Ikiahatsa Tesaronika ezektsa, Sesus tuktsa tsimaha. Ahabo hi piwatahaka. ²Deus myzo. Atahi pahapokzitsiki. Mypehakatsa Sesus Kiristu kino niwatihi pahapokzitsiki. Deus Sesus Kiristu ahatsa pahapokzitsikinaha. Iwatsahi Deus humo ahakurētsaktsa anawa hi Deus mozihikik.

**Kiristu myziksizoze hawa imyubaha mozurukunaha,
ana soho motsasoko ihuak ty mybo nyny my.**

³O mytukytsa ahamumo mykurētsa Deus bo tsimypamykysokonahaze: — O Deus Tesaronika ezektsa, asahi Sesus tuktsa humo mykurētsa — tsimykaranaha. Iwatsahi wasani mykaranaha. Sesus humo tsimyspirikpotohinaha. Tyharape pokzitsikinaha. Tyharape pokzitsitohinaha. Iwatsahi mykurētsa. ⁴Kytsa bo niwatihi ahasoho ty tsimypamykysokonahaze mykurētsa. Asahi Deus harere wabytsitsa izumubanahaze ahasoho ty tsimypamykysonaha. Katsaktsa ahasoho ty ustsa Sesus tuktsa bo tsimypamykysokonaha. Hawa ahapunihikrētsa tsmoziknaha. Iwatsatu sinini tsimykaranaha. Sesus humo ahaspirikporētsa iwaze ustsa kytsa pahasininiwykynaha. Sesus humo ahaspirikporētsa tsimykaranaha. Ana soho hi ustsa tuktsa bo katsa tsimypamykysokonaha. ⁵Ahasininiwy humo tsimykaranaha. Anatyhi Deus ahabo wasani mykara piwatawyky.

Ahasininiwy humo Deus tyryktsa tsmoziknaha. Ahasininiwy soho humo ahamysapyrētsa tsmoziknaha. ⁶Iwatahi Deus wasani mykara. Hawa ha tsa pahasininiwyky iwaze Deus tihi mysisininiwyky. Iwa Deus wasani piwatawy. ⁷Sesus myziksizoze ba sininizo zikaha. Katsa niwatihi mytsaty mytsaty byija taha. Mypehakatsa Sesus myziksizoze mykurētsa

tsimoziknaha. Sesus bijoikpe ikny mynasik naha humo taperyky. Sesus mynasikke ituk bijoikpe iknyktsa mynasiknaha. Sizikwyrēnikitsa.

⁸Mynasikke izo hyrizik waha my. Hawa izo mokoroba nahawa atahi amy imysapybara pepykwy. Iwa my. Myziksizoze asahi Deus humo simykparawybyitsa mysisininiwyky. Myziksizoze asahi Deus harere humo h̄ybyi ziknakaranahatsa mysisininiwyky. ⁹Asaktsa Deus pauk baze ba zikaha metutu tahawahi mynapykyryknaha. Iwa mysisininiwyky. Deus zuba imysapyrēnikita my ana humo kino batu sihyrinomyry. ¹⁰Sesus myziksizoze iwa pomoze. Ityryktsa isoho ty mopamykysoziukunaha. Asahi ihumo sispirikporētsa iwaze ipe maha:

— O Sesus ikia zuba wasani tsinakarata. Ikia hi tsamysapyrēta — maha. Ikiahatsa kino niwatihi situk Sesus bo tsimypamykysoziukunaha. Ihumo ahaspirikporētsa iwatsahi ibo tsimypamykysoziukunaha. Isapyha humo hȳ tsikykaranaha iwatsahi Sesus bo myharere tsizubakanaha.

¹¹Iwaze katsa Deus bo tsimypamykysonahaze. Pororo tsimykaranaha Deus bo ikiahatsa tsyhyryze tsimypamykysonaha. Ikiahatsa botu Deus harere bo hȳ tsikaha. Iwatsahi ipe tsimaha:

— O Deus Tesaronika ezektsa ahumo atyryktsa moziknaha. Ikia tsysitsumuēhīkī iwatsahi simysapyrētsa moziknaha. Asahi wasaniha mozihikiknaha iwatahi tsysitsumuēhīkī. Hawa wasani mozihikiknaha iwa sibo tsimykarana. Azikwy humo simysapyrētsa moziknaha. Hawa ha ty Sesus humo sispirikporētsa moziknaha — tsimaha. Iwa Deus bo ahatsyhyryze tsimaha.

¹²Iwaze kytsa mypehakatsa Sesus soho ahahumo mopamykysoziukunaha. Iwa zeka ahatuk tu niwatihi Deus humo tsiknakokonaha. Ikiahatsa kino niwatihi Sesus bo tsimysakibazikiknaha. Iwaze Deus pahapokzitsiki. Mypehakatsa Sesus zipehata kino niwatihi pahapokzitsiki, asahi pahapokzitsikinaha.

Sesus sukmo sohowy myziksizoze sa hawa maha.

2 ¹O katukytsa. Aba mypehakatsa Sesus Kiristu myziksizo naha soho humo mytsaty taha. Katsa ibo harape bo tsinazuzuknaha ana humo hi mytsaty tsimaha. Katsa ahape tsimaha. ²Mytsaty mytsaty byijataha. Kytsa ahabo motsasonaha zeka:

— O iwaha pomoze Sesus myziksizoze botu ziharamu — mykaranahaze. Ikiahatsa waby waby byitaha. Asahi mybarapetu mykaranaha. Asahi mymispihikbatakanaha zeka:

O iwaha pomoze Sesus myziksizoze botu ziharamu Deus hyrikoso mype nikara asahi mybarapetu mykaranaha. Utsa kino:

— O iwaha pomoze Sesus myziksizoze botu ziharamu Pauro mybo ziwatahaka asa kino niwatihi mybarapetu mykaranaha. Anaharere humo hi waby waby byitaha — mybarapetu mykaranaha.

³Siharere humo ka ja paikpa mytsaty mytsaty byitaha. Siharere bo ka waby waby byitaha. Mymyspihikbataikiknaha zuba. Ikiahatsa pykyhytutaha. Iwa ha mozumuze kytsa sizubarêtsa Deus harere bo batu hỹ zikaha. Tapara iwa maha. Simysapybyitsa mykaranaha ana humo kino siakparawy. Tapara kytsa Deus harere bo batu hỹ mykaranaha. Kyze maku mozumu atakta sipehakatsa mozik. Atahi Deus sukyrytsitsa pehatsa mozik. Ata kino Deus siakbatsa sapy bo myzipeha. Mopykba.

⁴Tapara kytsa mysimiwy. Nanabyitaba kytsa bo mybarapetu mykara. Imysapybyita mozuruku. Kytsa pipehanaha zeka atahi batu ma ziky batu isopyksapy. Amy humo kytsa wasani mytsaty mykaranaha ana humo hi batu hỹ my. Uta zuba abazubata my. Deus wahoro zubata bo mytsuk. Anaee dyhy my. Atahi — Utakta Deus my — iwa mybarapetu mykara. Imysapybyita mynakara iwatahi pispihikbataka.

⁵Uta ahatuk ikykaraze Tesaronika eze ana soho hi iksasoko. Kaharere kok tsihokdaharêna! Uta ahatukze botu iksasoko imysapybyita pehatsa soho humo botu iksasoko. ⁶Abaka Deus zikwy humo ba zikzumu. Iwaze pehatsa imysapybyita batu isukmo. Ana humo hi ahahyrinymyrêtsa. Deus yhỹ my zeka imysapybyita mozumu. Isukmo byizeka mahani. Deus hyỹ myze zuba imysapybyita mozumu.

⁷Abaka kytsa sizubarêtsa imysapybyita pehatsa harere bo hyỹ mykaranaha. Iwatsahi simysapybyitsa mykaranaha. Deus harere bo yhỹhabyitsa mykaranaha iwatsahi batu sispirikpo. Deus imysapybyita pehatsa soho mymywatawyky. Aibani zuba imysapybyita pehakatsa mozumu. Aba Deus hyrikoso myzubaha humo tsimypokzitsiukrêta. Atahi imysapybyita pehatsa pe batu hỹ my. Abahi atahi mymypokzitsiki piksispyk zeka. Iwaze imysapybyita pehatsa mozumu.

⁸Iwaze imysapybyita pehatsa natakaha. Mypehakatsa Sesus Deus zipehata myziksizoze imysapybyita pehakatsa pibeze. Hu my humo zuba pibezehik. Myziksizoze okoro zikywa mozik. Niytahi imysapybyita pibezehik.

⁹Iwaze imysapybyita pehakatsa Satanas harere bo hyỹ mykara. Satanas harereze mozumuku. Iwa mozumuze Satanas tamyrawy myziskyk. Itsapyriwy humo mysispihikbataikik. Amy ty kytsa zikaha baraty ana kino mykara. Tsapyriwy humo mykara. Iwa itsapyriwy piwatawyky. Kytsa bo mybarapetu mynakara. Ana pokso hi mypybyrêtsa mykaranaha itsapyriwy pokso iwatsahi mysimiwyikiknaha. ¹⁰Kytsa mysispihikbataikik. Asahi mohokdanaha hỹ. Imysapybyita mykara sibo mybarapetu mykara. Asa kino mohokdanaha amy ty wasani humo batu siakparawy. Amy ty wasani ana humo hi batu waby zikaha. Iwatsahi simysapybyitsa mozhikiknaha. Deus bo mysioktyhyryk batu hỹ sisopyk.

¹¹Iwaze kytsa Deus harere humo batu siwaby. Myspihikbatawy zuba siakparawy. Iwatahi Deus kino niwatihi:

— Ikiáhatsa mospihikbatawy zuba ahakparawy. Iwa za iharere tsipiwabynaha — my. Iwaze mysipihikbatakanaha. ¹²Iwatsahi tisapyrēna ty Sesus soho humo batu hỹ sisopyk. Simysapybyitsa mykaranaha zeka sakurētsa mykaranaha. Imysapybara siakparawy. Iwatahi Deus ispe my:

— O ikiáhatsa batu ahamysapy. Iwatsahi batu katuk tynapykyrykna. Ahawahi sinini ykarawy bo pahapeha ana bo metutu tsipahasapynaha — my.

Ikiáhatsa hi Deus harere bo hỹ tsimaha.

¹³O katukytsa ikiáhatsa meky watu tsikyzykna. Katsakta Deus bo tsimypamykysokonahaze ipe tsimykarana:

— O Deus Tesaronika ezektsa asahi Sesus tuktsa humo sakurētsa mozikna — tsimaha. Deus ahamo tsimypokzitsiukrēta iwatahi zahawatawy. Iwatsahi mykurētsa. Tubabatu zahawatawy. Iharere tsiwaby tsihikikna ikiáhatsa bo ziwatawyky. Iwatsahi Deus hyrikoso humo iharere bo hỹ tsimykarana. Wasani tsimykarana. Sesus humo ahaspirikporētsa. Ityryktsa tsikyzykna.

¹⁴Deus hi zahakzoko. Wasaniha humo zahakzoko. Katsa tisapyrēna ty tsiktsasokonahaze zahakzoko. Sesus mypehaktsa nimyko iwatsahi ituk tsimyzurukunaha. Katsa mykurētsa ituk tsimyzurukunaha. Zipehata Deus bo nimyoktyhyryk iwatsahi mykurētsa tsikyzykna.

¹⁵Iwaze mytukytsa amy ty katsa tsipahahyrynyrykynaha pykyhytutaha tynakaranahaktsa! Amy ty katsa ikiáhatsa bo tsiwatahakanaha pykyhytutaha tynakaranahaktsa! Tapara ustsá kytsa nimyhyrynyrykynaha ana hi mysopyk niyzik. Ikiáhatsa kino niwatihi mysopyk humo tsikspirikpotohinaha hỹ. Ana tyhi tsimykarana.

¹⁶Mypehatsa Sesus myhumo tsimypokzitsiarēta babata. Deus myzo kino niwatihi myhumo tsimypokzitsiarēta. Botu mybo nitsasoko:

— O ikiáhatsa katuk ahawahi tsinapykyrykna — my. Iharere humo mykurētsa. Mymypunihikwyky. ¹⁷Iwatsahi Deus bo tsimypamykysokonahaze ipe tsimaha:

— O Deus tysitsumuēhĩ, tysipunihikwyky. Iwaze hi pisapybakanaha. Wasape ha zuba motsasokona. Ikiá humo simysapyrētsa mozikna sakurētsa mozikna — tsimaha.

Iwa Deus bo ahatsyhyryze tsimypamykysokona.

Ikiáhatsa mytsyhyryze Deus bo tsimypamykysonaha.

3 ¹Abaka katukytsa ikiáhatsa Deus bo mytsyhyryze typamykysonahaktsa! Iwa typamykysokona:

— O Deus tisapyrēna ty Sesus soho ty situk typamykysonahaze tysitsumuēhĩ. Aidy sizubarētsa bo typamykysoziukunaha. Kytsa bo

mopamykysokonahaze iwaze aharere bo hỹ mykaranaha. ²Sakurētsa tisapyrēna humo maha. Ikiyahatsa mywatsa my. O Deus sisakimijanikitsa ba ziksisiniwynaha. Kytsa tisapyrēna humo sispirikpobyitsa siaknitsitsa mysibakzykykynaha. Asahi simysapybyitsa mykaranaha. Iki batu h̃y tsimy zeka ba ziksibanaha — tsimaha my.

Iwa Deus bo mytsyhyryze tsimypamykysokonaha.

³Mypehakatsa kino pahatsumuēhīekik. Pahakuwyky. Imysapybyita ba pahasininiwy. Sesus humo ka ba zahabezenaha Sesus ahahumo tsimypokzitsiukrēta. Iwatahi imysapybyikita pokso ja ba ahapybyhuk.

⁴Katsa ahahumo mykurētsa Sesus hi mymypokzitsiki ikiahatsa soho humo mysphikrētsa. Amy ty tsikahahyrinymyrykynaha ty atsatu tsimyzurukunaha. Myharere bo hỹ tsimykaranaha.

⁵Katsa Deus bo tsimypamykysokonahaze ahatsyhyryze niwatihi:

— O Deus sihumo tsimypokzitsiukrēta. Ana soho ty hi tsihyrinymyryky. Sihyrikbarasorykrētsa moziknaha. O mypehakatsa tsysitumuēhī Kiristu wata sipunihikrētsa moziknaha. Zipehata tsipunihikrēta ituktsa kino niwatihi iwata sipunihikrētsa moziknaha — tsimaha.

Iwa Deus bo ahatsyhyryze tsimypamykysokonaha, de.

Sesus tuktsa tarabaja mahatsa.

⁶Kyze mytukytsa usa spirikpowy tsimaha. Mypehakatsa Sesus Kiristu iharere ahabo tsimytasonaha. Wastuhu kytsa ahatuk zeka batu tarabaja zikaha. Ba ziksitsumuēhīnaha. Tarabaja batu h̃y zikaha. Sizikarētsa. Myspirikpowy soho humo batu waby zikaha iwatsahi sibo batu tyso. ⁷Ikiyahatsa botu ahahyrinymyryētsa. Katsaktsa ahatukze tsikahatsumuēhīkiknaha. Tarabajaziu tsikykaranaha. Iwa zikzurukunaha. Katsaktsa mypasaratsihikrētsa. Iwatsahi ikiahatsa astatu namysopykzuku mywatsa ikiahatsa ahapasaratsihikrētsa tsimoziknaha.

⁸Katsaktsa tarabajaziu tsikykaranaha. Okoroze unata kino niwatihi tarabaja tsikykaranaha. Ahadisahawy ty mybo nyny tsikykaranahaze katsa okyryrsaro ty ahabo nyny tsikykaranaha. Ihuak ty okyryrsaro nyny tsikykaranaha. Kytsa nymytsumuēhīkīnaha zeka okyryrsaro ty sibo nyny tsikykaranaha. ⁹Iwa tsimyzurukunaha. Ikiyahatsa astatu mysopykzukutsa kytsa. Mywatsa tihi tsimyzurukunahaktsa! Katsaktsa Sesus ykzohotsa disahawy ty mybo nyny tsimaha zeka wasani tsimaha. Katsa mykzohotsa ahawahoro tsarawybyita humo haīhaī tsimaha zeka wasani tsimaha. Katsaktsa batu h̃y tsimaha. Katsa hi tsipahatsumuēhīnaha okyryrsaro ty ahabo nyny tsikykaranaha. Iwaze myhyriziktsozkawy bo iktsa tsimaha. Iwaze ikiahatsa mywatsa tu tahaktsa! ¹⁰Botu tsiktzasokonaha ahape tsimaha:

— Aty mytuk mytytsumuehi ahabyizeka ba zik tadisaha. Aty mytuk h̃y habyi zeka iwatahi idisahawy ty batu ibo nyny tsimaha — tsikaha.

¹¹Wastuhu kytsa ahatukze batu ahaty tsumuēhī. Sizikarētsa maha mopamykysoikiknaha zuba. Batu iktsa zuba zikaha. Ana hi tsiwabynaha sizikarētsa soho iwatsahi tsinymyryzonaha ihyriziktsokzawy soho tsimaha. ¹²Myspirikpowy tsiwabytoktonaha. Wabyziutaha! Sihyriktsokzahabyitsa pe my:

— Mypehakatsa Sesus Kiristu humo tsipahakzonaha. Ihyriziktsokzawy humo zikbyituhukutu! Iwatsahi atukytsa tsimysidisahawykykynaha. Pykyhytutaha humo, wasani tsimykaranaha — tsimaha. ¹³Ikiahatsa, mytukytsa hi batu ahaku byrizikzumu tisapybakanahaktsa! Ahamysapyrētsa tsimoziknaha.

¹⁴Aty myharere bo ahabyi zeka tsinytoktonaha. Aty myharere papeu humo batu h̄y my zeka ba ituk zikpamykyso. Batu ituk zikparak iwaze hi tisikpybyrēta mozik. ¹⁵Iwata humo ba zikmykyriwy. Atsy wata ipe tsimy:

— O katsy Deus harere bo wabyty! Iharere bo hȳ tsimy. Ikia Sesus humo tispirikporēta tsimyka — tsimaha.

Aba kaharere mopykyk.

¹⁶Katsa Deus humo ahatsyhyryze tsikzapykykynaha. Katsa hi:

— O mypehakatsa ikia tsimymykywyky. Iwaze batu paikpa mytsaty tsimykaranaha. Ahakurētsa tsimynakaranaha h̄y — tsimaha.

¹⁷Abaka uta babata tu, piwataha. *Utakta Pauro ahahumo kahyrikbarēta* my. Iwa piwatahaka. Papeu humo tsizubarēna iwa piwatahaka.

Deus pahasapywyky.

¹⁸Abaka Deus pe my:

— O mypehakatsa Sesus Kiristu tysipokzitsiki. Sizubarētsa humo tsimypokzitsiukrēta — my. De.

Pauro